

شرفني الدكتور طوني وكلفني رَحْب فيكن بالاحتفال السنوي اللي
بيجمع كل العاملين بـ IPT.

هالمناسبة صارت تقليد سنوي بينتظروه الكل، صارت بمثابة محطة
تلاقي.. واستراحة ضرورية لا بد منها لأنها بتشكل الفاصل بين
مرحلة عبرت، ومرحلة قادمة ...

بين مرحلة ومرحلة .. فيه كثير أشياء بتتغير، الوجوه.. الأرقام ..
النتائج.. بين مرحلة ومرحلة بتبرز تحدّيات وعقبات ومسؤوليات
جديدة،

ولكن بين مرحلة ومرحلة.. بيبقى في ثابتة وحيدة لا تتغير وهي
استمرارية وديمومة المؤسسة اللي جمعتنا .. والاستمرارية يعني نجاح
... والنجاح يعني تعب وتفاني وإصرار، يعني أيضاً إزدهار وتفوق
وعيش كريم. وهيدي النتيجة بتشمل الجميع المؤسسة والإدارة
والموظفين وكل العاملين، وما بتستثني إلا الأشخاص أو العناصر اللي
ما بيعجبين أو ما بدن يكونوا بصدق شركا بالنجاح .. يعني شركا
بالتعب والمسؤولية والتفاني ..

وأنا متأكد إنو الغالبية العظمى من فريق العمل بـ IPT بيتألف من العناصر الجدية والواعية والطموحة اللي بتشتغل بضمير حي بدون تقاعس أولاً لأنها بتؤمن بمبدأ الشراكة، وثانياً لأن كلها ثقة بالقيمين على المؤسسة وبتطلعاتهن المهنية وكلها ثقة بسلوكنا الانساني والاجتماعي تجاه المهنة وتجاه كل العاملين معهم دون استثناء.

بصراحة .. أنا كفرد من مجموعة IPT .. بخجل إنني اتقاعس.. عن القيام بشغلي .. لما بشوف صاحب المؤسسة، هالشيخ السبعيني .. المليون شغف بالحياة والعمل.. بينطلق على أشغالوا صباحاً مثل كل الموظفين لا بل قبلهن وبيغادر مكتبو المسا على بيتو بعد الكل !

بخجل إنني اتقاعس، لما بشوف مدير عام الشركة المليون شغف بالعلم والمعرفة والتكنولوجيا.. عم بيقدم كل ما هو عصري ومتطور وسباق حتى يرفع المؤسسة إلى موقع اقتصادي وتنافسي عالي جداً ما بشرف فقط الشركة والعاملين فيها .. إنما بشرف البلد كلو سوا.

نعم بخجل إنني إتقاعس بشغلي ومسؤولياتي لما بفكر كيف بلشت الشركة من 30 سنة بمحطة محروقات واحدة وشي 10 موظفين

وعمال وصهريجين .. وكيف صارت اليوم تضم مستودعات، 200 محطة .. و 300 موظف .. وأكثر من 60 صهريج وآلية.

بخجل إني اتقاعس.. لما بشوف زملاء لـ إيلي .. كتار .. كيف أعطوا الشركة من عمرهم 25 سنة وأكثر باندفاع وشراسة والتزام إنما بصدق ومحبة وطيبة وأخلاق .. قدرو عمّروا بيوت وأسسوا عيل وفرضوا حضورهم المشرف بالمجتمع وبين الناس.

وقبل ما اختم .. بحب وجه نصيحة لكل موظف جديد أو كل موظف بعدو ببداية مسيرتو المهنية .. وبقلوا: ما تستعجل .. ما تحرق المراحل .. ما تسعى للألقاب والكسب السريع.. انت اشتغل، عمول اللي عليك .. بصدق، بمحبة وأخلاق وتأكد إنك بتكون عالطريق الصحيح وارج يجي الحصاد.. واليوم اللي بتتكرم فيه .. تقديرأ لجهودك وتعبك ونجاحك.

فبإسم رئيس مجلس إدارة IPT السيد ميشال عيسى .. وأعضاء مجلس الإدارة الدكتور طوني والأستاذ زخيا بتملكن جلسة ممتعة وبتأمل تكون هالمحطة السنوية، فرصة لتجديد التزامنا كفريق عمل واحد بتحسين ورفع سقف هالشركة أكثر وأكثر **حتى تبقى لنا IPT تلك**

الأم الحنونة الحاضنة لكل أبنائها، وذلك الأب الصلب والقدير الذي
ينتزع لهم الفرص من فم السبع.